



Ukraine-i Volgograd tesem nung defence plant ka amak

US Open: Devika Sihag semifinal-i iogo

Fed Up Nagas-i ita 3 tsüngda Naga yimten latetstsü züngzüksür

Dimapur, June 27, 2026 (TYO): Nagaland nung lanurtemi tentetba Fed Up Nagas ajanga Agri Expo, Chümoukedima nung sentong tulu ka ayongzüka agidang India sorkar dang ita asem tsüngda Naga yimten latetstsü takhangba agütsüogo.

India sorkar aser Naga yimtenren teloktem tsüngda yimten olemtepa aruba dak sendakba nung iba sentong agi.

"Tesüiba nung ama masü saka tanübo civil society teloktemi masü saka lanurtemi ang India sorkar dang mepishir. Chiciba sendaktepa alirtemji item lanurtem lir" ta Working Committee, Naga National Political Groups (NNPGs) Convenor M Kitovi Zhimomi-i ashi.

"Civil society temi parnok tajungtiba inyakogo saka kecha matalok, mapa kecha meinyak. Saka tanü lanurtemi item khuretem ajurutsü. Tanü lanurtem kanga tajung, parnok tarutsü kümzüka ayutsü atema parnok ya tim nisungtem lir. Parnoki yimjung nung linür ta ashir, terenlok aginür ta ashir, aser tarutsü kechi tia ajurutsü



June 27, 2026 nü Agri Expo, Chümoukedima nung Fed Up Nagas-i sentong tulu ka ayonga agidang shilem agirtem tangokba noksa ka angur.

metetnür ta ashir. Iba ya kanga tajung" ta Kitovi-isa ashi.

Iba rally nung NSCN-IM madenba atema kecha meshiteter saka Neokpao-Alezo'er telok nungi shidi ka anguba nung parnok kodamasüba timtem kar ajanga marutetba shiogo ta paisa metetdaksü.

Framework Agreement sign süteper küm 11 aser Agreed Position sign sür küm 9 süia arur. Item alizüngtem liaka Nagaland nung ozüng maliba tensa ka kümogo aser amokmerenba aser tashiyim agi sen meshiba

manener ta Fed Up Nagas-i ashi.

Item khuret ajak ya yimten melatetba ajanga lir. Yimten latetstsü atsülanga aruba ajanga ochimashi, temulung melemtep tali adoker aser iba lokti loksaa okdaksür aser telemsa adokdaksür ta Fed Up Nagas-isa metetdaksü.

"Naga nungeri joko maremzükteter. India sorkari

mapang atsülangba, paitokba anentsüla aser tenangzükbatazunglatem joko ojang dang agitsüla. Tatembang maliba asüngdangyaba, inyakyim atsülangba aser tema nung jungtepba anentsüla" ta parnokisa metetdaksüogo.

India sorkari Naga olemteperitem külemi sabang ka nung jaoktsüla aser ajak adenba

tenangzüktep ka agitsüla. Tangatetba tajung nung agreement ana sign sütepa aliba nung ajemdaker lemtetstsüla ta Fed Up Nagas-isa ashi.

Fed Up Nagas-i Union Home Minister Amit Shah dangi shidi ka züluba nung political agreements ana sign süa aliba nung ajemdaker tatembang lemtet ka agitsü takhangba agütsüogo.

June 27, 2026 nungi tenzüka ita asem tsüngda sendaktepa alir ajaki pusema iba nangzüka aliba ama yimten latetstsüla ta parnokisa takhangba agütsü.

"India sorkari iba nung tamakok ngura Fed Up Nagas-i kechi junger ta bilemdir inyaka aotsü aser iba nung civil disobedience aser non-cooperation movement adentsü. Naga nunger akhüm aser maitsü meyipa angutsü, aser onok tangar shinga kübok lia maruba jangjatsü atema onoki mapa inyaksü" ta Fed Up Nagas-isa metetdaksüogo.

NSF-i Bhojpuri Samaj aser Bihari Samaj den ajurupet

Dimapur, June 27, 2026 (TYO): Naga Students' Federation (NSF) nung Inner Line Regulation Commission ajanga Dimapur nung Bhojpuri Samaj aser Bihari Samaj den tongtipang senden ka menogo.

Inner Line Regulation (ILR) nung ashishitep malitsü aser akangakanga inyaksü atema telok ana dang nungi tebilembatem meshiogo ta Commission-i ashi.

Onoki tetenzük nungi sendaktepa alir ajak jaoka asüngdangya süa arur aser iba ya tashishitsü maliba, ajak adenba aser kasa maongka agütsütsü tangatetba nung inyaker ta parnokisa ashi.

Nagaland nung lisopurtemji

Naga nunger dang lir aser Inner Line Regulation tenzükbata lisopur Naga nunger putiotsü, yimtenren, lushi, rongsenketzüng aser sobaliba temetentem kümzüka ayutsü atema lir ta NSF commission-isa ashi.

Parnokisa sensaksem nung madenba non-Naga organisations dang tekaratiba nung NSF office den tongtepratepa shilem agitsü metetdaksüogo.

Bhojpuri Samaj aser Bihari Samaj-i shilem tajung agiba aser tebilembatem lemsatepba atema tenügsang agütsür aser lisopur Naga nunger temetentem kümzüka yua ILR mapa akangshitsü ta ILRC-isa ashi.

Naga nungeri mulung nung dang totzü agiteta agitsüla: Kitovi Zhimomi

Dimapur, June 27, 2026 (TYO): Naga nungeri haihaura mesüi totzü atsüteta agi tenzükra Nagaland-i takoksa tulu ajurutsü ta NNPGs Working Committee, convenor Kitovi Zhimomi-i ashi.

Tawa Centre aser Assam o Nagaland sorkartem tsüngda Memorandum of Understanding (MoU) sign sütepa ya senotsü angutsüba indang masü saka Naga nunger ali madak kibur aser

tashi temetentem atema lir ta Kitovi-i ashi.

"Agreed Position" kübok ali aser rongsen madak Naga nunger kibur asütsü aser ketdangsübarenji Naga Tatar Hoho ajanga asütsü lateta lir. 1962 16-Point Agreement ama sorkari sendaktepa alirtem paitoker aibelen masütsüla kechiyong iba ajanga loktiliba nung telemsa adokdaksü ta Kitovi-isa küm dangtsü olen ka ashi.

Ibai Tsüngrem aser America nunger asangtsüba mapang tajung lir : NSF



AKM lenirtem Molungyimsen yimtak Rev. Dr. Clark-i atemba küm 148 tain litchi dong kübok sensaksema angur. Ibai Naga lima nung kaketshisatsü sayu tenzüker küm 150 ajungbamung jeli sentong ka NSF-i ayongzükbata sentong nung shilem agiba anogo nung taongokba noksa lir. (June 26, 2026).

Dimapur, June 27(TYO) : Naga lima nung kaketshisatsü sayu aser angazük tenzüker küm 150 ajungba, Sesquicentennial of Formal Education in Naga Hills, 2028 küm matongdang jelia agiba sentong ka Molungyimsen nung Naga Students' Federation (NSF) teloki ayongzüka agiogo.

Iba sentong nung Rev. Dr. Clark-i atemba arishi küm 148 litchi dong nungi litchi aika ongzüka metsüjang rema yutsüogo aser aji kodang megua süngdong indir, iba süngdong tilatem, saplings, ji sangküm Naga lima ajaklen prokshia atemtsü. Iba jagi Naga nungeritemi Tsüngrem temeim aser America nunger aser Naga nunger mezüng Khristantemi inyakba temeim mapatem bilemtetstsü ta NSF lenirtemi ashi.

Iba sentong nung jembidang, "Naga lima nung kaketshisatsü sayu aser angazük tenzüker küm 150 ajungba mapang ya asenok Naga nungeritem asoshi Tsüngrem tenüng asangba aser America nungeritem dang kanga pelar ta ashitsü mapang tetemsü aser tajung ka asütsü," ta NSF lenirtemisa ashi.

Iba sentong nungsa, Sesquicentennial of Formal Education in Naga Hills amungtsüba tenüng nung NSF-i "Powered 60" sentong ka sangdongogo. Iba sentong ajanga sensaker kibongtem nungi züngtetba lanurtem shirnoki civil service atema UPSC tatidang agütsüner, parnok asoshi Coaching aser Mentorship agütsütsü ta NSF-isa metetdaksü. Iba teyari ya

Nagaland nung Assembly constituency shia nisung kaka nem agütsütsü sentong nung lir.

Kasa sentong jembidang, Naga nunger shiai Naga kintem putepa alitsü asoshi inyakdaksüner ta NSF-isa mepishia metetdaksü.

Iba sentong nung jembirtem rongnung NSF tir Wb. Mtseuding, Sesquicentennial of Formal Education in Naga Hills Planning Committee nung tayonger Wb. K. Temjen Jamir, Sesquicentennial Planning Committee züngsem, Wb. Medo Yhokha aser SDHO Tuli Wt. Imchalemla nungeritem liasü.

Iba sentong nung Molungyimsen Arogo aser yimten lenirtemi shilem tajung agia liasü. Iba sentong nung menden AKM Education Secretary, Sp. Akokba liasü.

Iba kasa anogo nung, NSF aser AKM lenirtemi Molungkimong yim semdanga liasü. Iba mapang parnok Rev. Dr. Clark aliba ki aser pai inyakba mapa aser tesemtem repranga jajar külen, Molungkimong Arogo aser yimten lenirtem den sarasadem mapang tajung ka agia liasü.

Taküm küm nungi tenzüka 2028 küm tashi NSF teloki Sesquicentennial of Formal Education in Naga Hills amungba tenüng nung Naga lima tesem balala nung sentong tapu balala ayongzüka Tsüngrem aser nisung nem tenügsang agütsüba sentong agitsü ta NSF lenirtemi metetdaksüogo.

Terenlok akatsü asoshi Naga nunger tangatetbamelenshitsüla MLANuklutoshi



Hon'ble MLA Wb. Nuklutoshi Longkumer-i "L. Pangersowa Road" lapoktsür kelen lenirtem den tangokba noksa angur.

Changtongya, Aami /June 27(TYO): Tanü Hon'ble MLA Wb. Nuklutoshi Longkumer-i lenmang ana "Longchara junction to R.C. Chiten Memorial Govt. High School Road" aser ano "L. Pangersowa Road" ta lapoktsüogo.

Naga lima nung Naga nüburi ali tashi kanga junga meteta kibur kümtetba agi Naga lima nung terenlok mapa aika meinyakteti atsüita ayur. Iba ama timtem aliba ajanga Naga lima nung terenlok mapa jenti küm ka nung inyaktetsü mapa küm ter nunga metemteter, anungji Naga nungeri Naga lima nung terenlok aginera tangatetba melenshitsüla ta MLA Wb. Nuklutoshi Longkumer-i lenmang ana ya lapoktsür kelen R.C. Chiten Memorial Govt. High School, Changtongya Auditorium nung sentong agiba nung jembidang ashi.

22 Arkakong nungeri shimtetba MLA Nuklutoshi-isa "Longchara junction to R.C. Chiten Memorial Govt. High School Road" aser ano "L. Pangersowa Road" iba

lenmang ana ya inyaktetsüsa temelaba agüja yaritepba asoshi Nagaland Chief Minister Dr. Neiphiu Rio aser Advisor for Urban Development & Municipal Affairs Wb. Zalio Rio tena dang pelaba lemsatep. Paisa iba lenmang inyakba mapang nung ali kiburtem aser nüburtemi tangatetba tajung nung yaritepba asoshi tepelaba lemsatepba den iba mapa ketdangsüa inyakeri mapa tembang küm ka züngzüngsüba nung ita ana tsüngda nung iba mapa kanga dang temelung chia inyakteta tembangtetba asoshi tenüngsang agüja ashi.

MLA Nuklutoshi-isa Naga nungeri Naga lima nung akaba rongsen toztü atsütettsü memelunger, memenui mapang ka nungbo toztü mamshi-i anü tashi aser mupong tashi agi mapa inyaktetsü, anungji tang putu-i kechi nungtakar ibaji meteta Naga nungeri pei temoatsü amshitsü Khristan jakla nung tangatetba agi timi alitsü nungtakerta ashi.

Sentong nung Tsüngremer lenisüba jazüka Longchara Baptist Arogo Pastor

Wb. Imotemjen Ozüküm-i sarasadem aser Wb. Samuel Jamir lenisüba nung sentong ketdangsüa agiba den Er. Walu Urban Wing-III, Kohima Nagaland ajanga Technical Report agütsü aser iba den Wb. Sangpangchang Longkumer SDO(C) & Executive Officer, CIC, Changtongya, Wb. Tamenin Chairman, Akhoya Village Council, Wb. Akum Jamir Advocate, Changtongya Town Council nungi, Longchara, New Medical aser Tzümok-kong tenüng nung Wb. O. Shilu Jamir Wb. Chubasenba Longkumer HM, R.C. Chiten Jamir Memorial GHS, Dr. Imosanen CHC Changtongya aser Akhoya Senso Mungdang Tir Wb. Imsüakum Jamir parnokia shilem agia jembia liasü.

Tanü lapokba lenmang ana ya "Longchara junction to R.C. Chiten Memorial Govt. High School Road" ya 1.20 kilometer aser "L. Pangersowa Road" ya 1 kilometer aser sen Rs. 2 Crore 91 lakh indoka kanga dang süsüa yanglua lir.

Labour Department-i draft Rules indang metetdaksü

Dimapur, Aami/June 27 (TYO): Nagaland sorkar kübok Labour Department-i, stakeholder, employer, employee, trade union, establishment, lokti tentet balala aser nüburtem dang, Labour Codes kübok draft Rules Department indang official website nung upload sütsüba metetdaksüogo.

Temzüng ozüngtem ya meteta alitsü aser managajemba tem asüngdangteptsü atema enoktsüogo.

Draft Rules nung provision tem dang sendakba nung tashishitsü mesüra tebilemba shidangtsü kar danga lira benoktsü atema stakeholder tem ajak jaokogo. Draft Labour Codes/Rules ya Department

indang official website ajanga lapoka repringtettsü.

Tashishitsü mesüra claim tem ajak osang agütsüba sülen anogo 30 tsüngda tezüluba nung Labour Department nem agütsütsü metetdaksüogo. Shiti ya labcomm-ngl@nic.in dangi address sütettsü.

Maneni Stakeholder tem dang section/rule tapet shisemtsü aser iba den justification mesüra pei tebilembatem benoktsü mepeshia metetdaksüogo, koba Department-i asadangtsü.

State nung Labour Codes takok ngua benoktsü atema stakeholder tem ajaki shilem agütsü aser teka amteper inyaktetsü Department-i imlar, ta kasa sangdong ajanga metetdaksü.

Tetso College nung International Day Against Drug Abuse mungogo



Dimapur, Aami/June 27 (TYO): Dimapur District Legal Services Authority aser Tetso College, Dimapur na den longjemer Nagaland State Legal Services Authority-i, June 26 nü International Day against Drug Abuse & Illicit Trafficking amungba anogo Drug Abuse & Illicit Trafficking dak sendakba nung Legal awareness sentong ka ayongzüka agiogo.

Iba sentong ya Lorin Hall, Tetso College nung agia liasü.

Sentong nung o jembiba mapang Member Secretary, NSLSA Neiko Akami-i, kaketshirtem dang temesepba mozü achiba ajanga item achirtem dang masü saka lokti ajunga dak kongshir ta ashiba den, Narcotic Drugs and Psychotropic Substances (NDPS) Act ya ozüng tesashi ka aser ajaki meteta alitsü nüngdaker ta shisem.

Paisa, Nagaland Police-i 2026 küm June ita tashi nung küm pezü tsüngda ken o 766 benokogo, ta ashi. Pai, lokti nung tangar memenepi alirtem nem Legal Services Authority-i angati legal service balala agütsüba indang metetdaksüba den, District Legal Services Authority aser Nagaland Legal Services Authority nungi angati legal teyari aser service agitettsü ta shisem.

Sentong nungsa CJM cum Secretary, DDLSA Atoka Achumi-i, criminal justice system indang tangazükba

agütsü aser ashiba agi, aija alir ka pai aibelenba kuli mongutet tashi pa dak kecha tai mali ta züngshir, saka nüburtemi nisung ka pura obendang agüjtoker ama bilemer. Obendangba inyakyim ya kuli dak ajemdaker aor.

Paisa, NDPS Act aser POCSO Act indang kaketshirtem nem metetdaksü. POCSO Act dak sendakba nung pai, victim ka indang maitsü metetdaksüba ya aibelen ka ta ashiba den tatalokba kar lemsatepa liasü.

Kasa mapang nung Panel lawyer Zuchumpeni Ngullie-i, NALSA (DAWN-Drug Awareness and Wellness Navigation-For a Drug -Free India) Scheme, 2025 indang lemsatep. Laisa, Scheme nung provision tem aser help line indang metetdaksü.

Iba sentong ya Retainer Lawyer, DDLSA Sonile Seb lenisüba nung agi, aser lai Legal Services Authority inyakyim indang aser lokti nung tangar memenepi alirtem nem angati legal teyari agütsüba indang metetdaksü.

Sentong nungsa college naklo ken aten, NALSA DAWN Scheme, 2025 indang Video presentation, BBA-i Special presentation ka agüja liasü. Iba sülen sensaksem sentong ka agi aser Tetso College, Principal Dr. Hewasa L Khing-i anküp o jembir sentong tembanga liasü.

El Gibor-i Inter-Church Battle of Bands kokogo



Kohima, Aami/June 26 (TYO): Nepali Baptist Church Kohima nungi El Gibor-i, Inter-Church Battle of Bands - Beat of Glory kokogo. Iba tetoktepba ya Hokolbarnü State Academy Hall, Kohima nung agia liasü.

Iba tetoktepba ya Yimkhiung Baptist Borü Kohima Youth Ministry-i, "Worship Through Music" omen nung ajemdaker ayongzü, kong arogo 11 nungi kentenba telok balalai shilem tajung agia liasü.

Tetoktepba nung shilem ka ama kentenba telok ajaki "God's Design (BOW)" ken

aten aser iba den parnok mejenba ken kaka tena liasü.

Sentong ya Runshito Lims lenisüba nung agi, aser Yimkhiung Baptist Borü Kohima Pastor T. Wongtokiu-i Tsüngrem temaotsü meshizüka sarasadema liasü. Sentong nung guest band ama Faith Band-i shilem agi.

Telok balala kanga sütepba toktepba sülen El Gibor-i takok angu aser parnok sen senpet sen 70,000 agütsü.

Most Promising Band award ya Yimkhiung Baptist Borü Kohima nungi DCY nem agütsü. Parnok nem senpet sen 30,000 agütsüogo.

Maneni tetoktepba nung jurila sempettema agütsüogo. Affinity (Naya Jeevan Baptist Church) nungi Imkong nem Best Keyboardist, DCY nungi Danrito nem Best Drummer award, Nepali Baptist Church Kohima nungi Novin Gurung nem Best Bassist, DCY nungi Akhum nem Best Guitarist aser Ablaze (YBBC) nungi Kiukhum nem Best Vocalist award agüja liasü.

Sentong ya Yimkhiung Baptist Borü Kohima Clerk Wongso-i sarasademer tembang aser iba sülen sentong nung shilem agirtem aser sempet angurtem noksa agiba mapang agia liasü.

UNSC nung permanent seat atema India temsüa lir: Seychelles



June 27, 2026 nü Victoria nung Seychelles nung aliba India nungertemi Ato kilonser, Narendra Modi agizükdang tangokba noksa nung angur. Kasa noksa nung Seychelles Tir, Patrick Herminie-a angur.

New Delhi, Aami/June 27 (Agencies): Honibarnü Seychelles foreign minister, Barry Faure-i, United Nations Security Council (UNSC) nung

India nem permanent seat agütsütsü atema temsüa lir, ta metetdaksü.

Osangbenertem den jembidang pai, "Alima nung India jenjang, nütsüng jenti aliba aser alima nung yimjung atema India-i inyakba ajanga alima nung telemtetba agiba tongti tentet (UNSC) nung adentsü India temsüa lir," ta metetdaksü.

UN Security Council nung temelenshi kanga nungdak, ta shia Faure-i, India aser Africa region-i mapang talangka alima sabang nung tongtibang shilem

agia arur, ajisüaka alima sabang nung parnok nem tim menden magütsür, ta ashi.

"1945 kum tentetba tentet nung temelenshi nungdaker. International institutions-i tanü atangji ajakji meyipa repringshitsüla. Liromedemsü nungdak, talisa India ama linüktem aser Africa region nem alima sabang nung tim menden magütsür," ta pai ashi.

"India nem UNSC nung permanent seat agütsütsü atema Seychelles-i pusemer; India züngsemba ajanga alima nung yimjung aser linüktemi amalitepa inyakba jenjang tajungba akümtsü," ta pai metetdaksü.

Paisa India-i alima nung

yimjung, tzüyim nung security aser Non-Aligned Movement atema tongti shilem agiba metetdaksü.

Seychelles linük kum 50 ajungba Jubilee sentong nung tetushi tejaoker asütsü atema jaokba ama Ato kilonser Modi-i iba linük semdanga Honibarnü tonga ogo.

Modi-i June 27-29 anogotem nung Seychelles semdangba mapang Seychelles Tir, Patrick Herminie den-a senden mena linük ana tsüngda tesendaktep tajungba akümtsü atema jembitsü. Modi-i National Assembly of Seychelles nunga o jembitsü aser yangji aliba India nungertema ajurutsü.

Japan PM Sanae Takaichi-i tang mezüng India semdangtsü

New Delhi, June 27 (Agencies): Ministry of External Affairs (MEA)-i, Japan Ato kilonser, Sanae Takaichi-i tang mezüng India semdangtsü, ta metetdaksü.

Lai July 1-3 anogotem nung India semdangba mapang nung 16buba India-Japan Annual Summit nung shilem agitsü, ta MEA-i metetdaksü.

Iba summit nung Ato kilonser Narendra Modi aser Takaichi nati linük ana tsüngda sector balala nung amalitep jenjang repringshiba den külemi regional aser international onüktem nung o lemteptsü atema maongka angutsü, ta MEA sangdong nung shia lir.

Takaichi Ato kilonser akümba sülen lai tang mezüng India

semdangtsü aser ibaji ajanga India-Japan Special Strategic & Global Partnership tashi itshitsü.

Yaküm August ita nung Ato kilonser Narendra Modi-ia Japan semdanga liasü aser 15buba India-Japan Annual Summit nung shilem agi.

Iba mapang nungji linük anati asalentong, rongsenkettzüng, technology aser security tsütsü amalitep tashi taitba akümtsü atema bangjema liasü.

India aser Japan na tsüngda shishilembaba, investment, defence, security, infrastructure, high-speed rail, digital technologies aser clean energy sectors nunga amalitepa inyaker.

Tan ita tetenzüklen France nung 52buba G7 senden nunga

Ato kilonser Modi aser Japan Ato kilonser na ajurutepe liasü.

Iba mapang nungjia lenir anati shishilembaba aser investment nung rangloker linük ana tsüngda rongsenkettsüng tsütsü amalitep tajungba akümtsü atema jembia liasü.

Yaküm August ita nung Japan yimtiba, Tokyo nung Ato kilonser Modi aser taoba mapang Japan Ato kilonser Shigeru Ishiba nati "Partnership for Security and Prosperity of Our Next Generation" ta ser külem sangdong ka agüja liasü.

Lenir ana jagisa 'Joint Declaration on Security Cooperation' sangdong metetdaksü. Iba kübok linük ana tsüngda defence aser security tesendaktep tajungba akümtsü.

Donald Trump-i India semdangtsü: Marco Rubio

New Delhi, June 27 (Agencies): Honibarnü US secretary of state Marco Rubio-i, sangküm kum tetenzüklen US Tir Donald Trump-i India semdangtsü atema Donald Trump administration-i inyaksangshidar, ta metetdaksü.

Paisa, India ya US atema partner tajung ka lir, ta metetdaksü.

2027 kum Trump-i India semdangtsü aliba dak sendakba nung tasüngdangba ka langzüdang Rubio-i, "Onoki ibaji imlar, aser iba atemaji inyakdar. Sangküm kum tetenzüklen Tiri semdangtsü," ta metetdaksü.

US atema India ya tongtibang partner ka lir, ta shia Rubio-i Ato kilonser Narendra Modi aser US Tir Trump na tsüngda tesendaktep junga aliba

metetdaksü.

"India ya US atema tongtibang partner ka aser tesendaktep junga aliba linük ka. Iba denji külemi Ato kilonser aser Tir na tsüngda tesendaktep junga lir. Ibaji asalentong atema kanga tongtibang ta ni bilemer," ta pai metetdaksü.

2020 kum February ita nung Trump-i India semdanga liasü. Iba mapang nungji Trump aser Modi nati Ahmedabad yimti nung "Namaste Trump" rally nung shilem agia liasü.

Trump tanaben Tir akümba sülen-a Modi tena mapang shia ajuruteper.

India aser US nati shishilembaba, defence, technologies aser Indo-Pacific nung security atema taliba amalitepa inyaksü atema mapang shia jembir.



June 27, 2026 nü Bhubaneswar nung Youth Congress züngsemtemi NEET-2026 examination paper leak dak sendakba nung Union Education Minister, Dharmendra Pradhan-i menden nungi anentsüla, ta takhangba agüja longkak aitba noksa nung angur.

FCRA ya yimsü kar anema masü: Kerala BJP Tir

New Delhi, June 27 (Agencies): Khristan organisations aikati Foreign Contribution (Regulation) Act (FCRA) amendments anema ola adokba dak sendakba nung Kerala BJP Tir, Rajeev Chandrasekhar-i, election mapang nung Congress-i iba onük ya yimtenren onük ka kümdaksü, ta tai tongloksü.

Osangbenertem den jembidang pai, "Election mapang nung Congress-i iba onük ya yimtenren onük ka kümdaksü, aser ibaji ajanga Khristantem aikati onok pumesemi liasü," ta metetdaksü.

FCRA özüng yanglushitsü aliba ya Khristan melungtet teloktem anema lir ta jembir, ajisüaka FCRA kübok yimsü balala amangertem organizations ajaki bendanglen nungi senotsü angur, ta pai metetdaksü.

Paisa, FRCRA özüng yanglushitsü aliba ya yimsü ka amangertem anema masü, ta ashi.

"Iba özüng yanglushiba ya bendanglen nungi anguba senotsü amshiba tsütsü ochimashi nokdangtsü atema lir.

Home Ministry-i yamaji shiogo. Iba Bill nungji kar anema amshitsüsa kecha mali," ta pai metetdaksü.

Organisations kari danga iba atemaji tebilemtsü kara parnoki arendaka jembitsü melenbo Union Home Ministry den jembitsüla, ta ashi.

"Kari danga iba atemaji tebilemtsü kara parnoki Home Ministry den jembia iba Bill angatettsü merangtsüla. Nungdak dang süra ni iba atemaji jembitsütsü. Iba Bill aser amendments ji nai tejangja angatetnura onoki pelapela iba indangji nenok den jembitsü. Sorkaria iba dak sendakba nung shisa lemsateptsü melunga dang lir," ta pai ashi.

Tzüngluruwa mongpu Parliament nung FCRA Amendment Bill benoka o lemteptsü tebilemba lir. Iba özüng yanglushiba ajanga mission mapa inyakba Khristan organisations aika kongshitsü, ta Arogo nung lenirtemi tsübur.

Tesüiba kum 10 tsüngda Ministry of Home Affairs (MHA)-i melungtet telok senotsü amshiba tsütsü ochimashi nokdangtsü atema lir.



June 27, 2026 nü New Delhi nung Israel Embassy kima National Security Guard (NSG) sepaitemi 'mock drill' agidang tangokba noksa nung angur.



TIR YIMYIM YIMOBILEM (EDITRIAL)

DIMAPUR SUNDAY, JUNE (AAMI) 28, 2026

Tsüngremi anitetba

Anogo shia asen taküm aser kibong lia aoba ya tesümgangtsüka lir. Ya odangbo masü. Asenok tang aliba lima nung ya asenok arua alitsü tabo asenok shingaia tebilema mebilem. Asenok tang aliba ki aser asenok tang inyakba mapa ya asenoki akhidang nungi bilemba ki aser mapato masü. Item ajak ya asenok masodang nungi Tsüngremi renemtsüba mapatem lir. Aji oda, "ni na tepok nung meyangludang na meteta liasü aser na masodangyongi ni na meshiteta yutsü, kintem dangi ainker ka asütsü ni na shimtet," ta Tsüngremi küm 20 asangur chanu Yerimia dang ashiba Yerimia 1:5 nung angur. Ibai tesümgangtsü. Asenok shi tekolok agibo ibai angatetsü aser rajemtsü makok. Ajisüaka, asenok tongmelang tamang ka agi, au, Kibubai ni masodangyongi Pai ni meteta liasü, Pai kü lenmang renemtsür liasü ta shia Pai ashiba angaa alitsüba dak alaka asenok mezümekümtsü mesüra nemjemtsü kecha mali. Aji oda, Efesa tapu 3:14 nungbo Tsüngremi asenok kibong shia tenüng kotak nung aser alima nung agüja lir ta shia angur. Ibai junga alirtem asoshi kanga tepelatsü aser mejungi alirtem asoshi kanga tetsübuttsü osang ka lir. Ibaisa tesümgangtsü taketba. Asenok kibong ya asenoki asenok dang ajungba aiür aser asangur bushia aküm ama asenoki bilema alitsü akok, saka yamaji masü ta iba Laishibai asenok nem angatetdaksür. Aji oda, kija taküm süshia, kibong süshia Tsüngremi anitetba taküm aser Tsüngremi kümtsüba kibongtem lir. Tsüngremi asenok ya tazüngla nungi taküm lidaktsü aser kecha masüba jenjang nungi asenok jangratema alitsüsa anitet. Aji oda, Laishiba nung Tsüngremi anitetba aser Tsüngremi amshiba nisungtemji reprangdangra nisungi mezüngshiba nisung aser kibong nungi adokba nisungtem dang angutsü. Tsüngremi Pa mapa inyaktsü asoshi nisung tsüngdang tain aser tasü tait asüba purtem masü saka tanur aser ajemalu nisung dang Pai shimtet. Ajisüaka, kodang Tsüngremi nisung ka mesüra kibong ka anitetdir, par taküm aser kibongji tesümgangtsüka akümba asenoki angur. Aji oda, kodang Tsüngremi Abram dang par tsüraburtem aliba Ur lima nungi par ki aser par kinünger ajak toktsür Kanan limai aotsü ashi, iba anogo nung Tsüngremi Pa taküm aser kibong ajanga Pa nükjildong amshitsü asoshi kin ka yanglutsü tetenzüker liasü. Iba kin nung jagi alima meimchirtem ajak kümzüksüsa Tsüngremi chir Yiru Khrista aru. Tsüngremi Abram dang Ur lima toktsütsü ashidang, pai par tsürabur senmang aser par kinüngertem medoktsütetka asübo tanü alima nung Abraham tenüng metetshila aser pa nungi jakzüka kin kata melila. Aji oda, kodang Tsüngremi Israel nunger alar tia nungi anitettsü asoshi mulungtet, Pai Israel nunger tashitemeteter mesüra asojen tajung mebushi saka oagi shingaia memetetba bendang lima ka nung tangar san nüka alisang Mosa dang shimtet aser pai Israel nunger alar tia nung aliba anitet. Palestine nunger den tongbang tesashi nung nokdaka yur, Israel nunger chubai anir sepai tongtipur shingaia Goliath den raratsü tasü meittet. Ajisüaka, Tsüngremi tila tanur David-ang shimtet aser pa tulus küm daksü. Yisu Khrista alima nung alidanga Pai pa nütüng asütsü asoshi tulus takartem masü saka sensaker aser ayangertem dang Pai anitet. Item nütüngtem dak alima tashi temetet kecha mali asü saka alima lenirtem aser tashitemeteterteri süngmangtsüsa parnoki inyak. Parnok ket nung sen aser hon-taribi mali asü saka parenoki sen agi malizüketba taneptsü aser tekümtet agütsü. Tanüa kasa mapaji Tsüngremi na aser nür kibong ajanga inyaknuba nai meteta alitsü südi. Idangji, ashiko, nai na rongsen makaba indang bilema atidaka alitsüa akok, nai na tanur ta bilema alitsüa akok, nai na tazüngba nisung masü ta bilemstüa akok, saka Tsüngremi ashir, item ajakji Ni nü nem agütsütsü. Asenok mapaji apusotsüba dang lir. Asenoki mapuso tashi Tsüngremi aginüba tesem aser jenjangji matongtsü.

OLEMSABANG

Manga-i teshinem menemba tesem nung dang linur

~ L. Kika Pongener.

Manga (House Fly) ya sangnu tilaka lir. Manga yagi kong teshinem tamajung menemer ibala tesem nungji dang linur. Mimchir, shiruru aser ozü-sangnu ajaki temeruk aser teronem tajung aliba tesem nung dang linur. Otsüla-oboula nungeri Manga yagi atishia, nisung shirnoki tajung memeimer, tajung nung mepelar, saka tamajung dang meimer aser bushir parnok dangji, "Manga-i teshinem menemba tesem nung linuba ama"...ta jembir. Tanü asenok aliba putu ya tashitemeteter putu ta jembir; saka koba-teka tashitemetet lir; patakaji tebenja aser teraksa agi sunga lir. Tanü putu nung yimden, arogo aser loktiliba ajak nung lennir asütsü kanga dang tasak. Aor shin o ka...."Koktenra leptsügmeki aser songtokra mangtsügsong ama"...ta jembir. Ka inyakyonga majung aser tanga ka inyakyonga ajia majung. Tetezü, tajung danga majung aser tamajung danga majung...ta ajaba putu lir. Ano otsüla oboula nungeri...."Shiranger bang dang shi-a majung aser angoo-a majung"...ta jembir. Atangji, shirang dangpo tebang-temeli ajak takü kümdaktsür; ibajagi chiyungtsü tajung shi/ango ajak takü dang chiteter. Ibaji mesuka, nisung shirnok shisatsü teindang masü; temulungsentsü ajak tamajung agi sunga lir; parnok jagibo yimden, arogo aser loktiliba longjema, sunep-sunepa, yimjung nung alibaji maginutsü. Parnok tenuk agipo tajung ajakji tamajung dang ajitettsü. Manga-i teshinem menemba tesem dang meimba ama....Shirnok temulungsentsü teindang masü; parnok jagipo yimden, arogo aser loktiliba ajanga nungji teti tsükchitepa, arishitepa aser meputepi lemsar alitsüba....Ibaji dang bushitsü.

Tanü putu ya mapa tajung inyakba nunga junger ta tenungsang magütsünuba putu ka lir. Asenoki tanü asen lima nung yimden, arogo aser loktiliba ajak jungjunga reprangdanga ora, ochi, yimjung, telongjem aser temeim agi kanga anungakonga lir. Atangji, tanü asen lima nung yimden, arogo aser loktiliba teimba ka nung meputep, tsükchitep, tenukmeremtep, tesempatep aser telemsa agi sunga lir. Oda tema tereprangtsü nungbo tobur kanga tajung, yimjung nung longjema lir amai; saka kodang telung tashi yia anguoka reprangdangdir; kati ka küpok melitetba, kati ka den arishitepba aser tuluba shisatepba agi sunga lir. Linuk ka, yimtsüng ka, lokti ka nung nubur yimjung nung, longjema aser sunepa alitsü atema; yimsusuri nema lur nubur dang asü-anguma, nubur taginuba angateta yimsu asütsüla;. Nuburtemi yimsusur dang tenzüksüla aser yimsusur o nubur tsüngda amalitepa lira; iba linuk, iba yimtsüng aser iba lokti nungji nuburtem sunepa alitsü. Koba linuk, koba yimtsüng aser koba lokti nung nubur tsüngda yimjung nung longjema lidir; idakji nuburtem tetsübu tatenden kecha meli-i, sadok-sadoka longjema pelatepa alitsü. Ajisuaka, koba linuk, koba yimtsüng, koba lokti nung yimjung aser telongjem meli-lir, yangji tenla kidang Tsüngremi külemdanga; nubur shinga tejak tesangwa nung pelaseta, sadok-sadoka Tsüngremi mekümlmettsü.

Alima nung nisung ajak ya tangatetba küsa masü; tia maka nisung karbo; yimden, arogo aser loktiliba ajak nung mepetmesu adoka lemsar dang alitsü jangraba; ibaji dang aginuba aser bushiba nisung karbo lir.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Khristan teloktemi Venezuela nung menoknok agi kongshirtem yarir



Venezuela nung menoknok lendong mapang raksaba Tenla ki ka noksa nung angur.

June 26, 2026: June 24, 2026 nü Venezuela nung menoknok ajanga nisung jenti asüba sülen Operation Blessing, Samaritan's Purse aser Convoy of Hope ama Khristan melungtet teloktemi teyari agütsüba maparen inyakdar.

Operation Blessing indang global disaster response director, Diego Traverso-i, "Onoki tzü tajemtzü, süki aser medical teyari agütsür. Onoki Brazil nungi onok indang doctor tem den medical team Venezuela-i yokogo," ta metetdaksü.

Samaritan's Purse nungia Disaster response specialist tem Venezuela-i yokba den külemi Samaritan's Purse indang 767 Cargo tayimtsü ka ajanga teyari oset aika bener otsüogo, aser item rongnung Emergency Field Hospital ka densema lir.

Samaritan's Purse-i, "Onok indang Emergency Field Hospital nung anogo shia nisung 100 dak tali nem treatment agütsütettsü. Emergency Field Hospital nung surgery agiba takdang aika den critical care unit ka, pharmacy ka aser laboratory ka densema lir," ta metetdaksü.

Parnokisa, "Samaritan's Purse-i tayimtsü ajanga süki, solar lights aser

blankets aika bener otsüogo," ta metetdaksü.

Samaritan's Purse Director, Rev. Franklin Graham-i, "Asüngsashitsü atema mapang talangka agitsü. Caracas aser La Guaira nung takoksa anguba aser teraksatsüba asadangba ya tang ang tetenzüker südi, ta ni bilemer. Hospital aika raksatsüogo, gari lenmang aika kakdangogo aser kiojen noklang aika chirepogo. Nisung jenti moapu nung timtema litepdar. Parnoki asen sarasadem nüngdaker," ta metetdaksü.

Paissa, "Iba takoksa aser timtem ngua onok melung raksar. Onoki iba linük meimer aser onoki Yisu tenüng nung akokba tashi parnok yaritsü," ta metetdaksü.

Ano Missouri nung amenoka aliba Khristan melungtet telok Convoy of Hope-ia Venezuela nung emergency supplies, chiyungtsü aser tzü tajemtsü agütsüba den 'mobile kitchens' nung sorochocha iba lendong agi kongshirtem chiyungdaksür.

Convoy of Hope National otongdar, Ethan Forhetz-i sangdong ka ajanga, "Venezuela nung teraksatsüba ngua temelung raksar. Nisung jenti süogo. Convoy of Hope-i akokba

tashi lendong nungi jenburtem nem nüngdakba teyari balala agütsütsü," ta metetdaksü.

Convoy of Hope ya 1994 küm tentetba Khristana melungtet ka lir. Parnoki Arogotem, businesses aser sorkar agency tem den senteper lendong balala nung linük 130 dak tali nem teyari agütsür.

Ano külen tanga osang ka nung, iba menoknok ajanga Tenla ki aika raksatsüba den Arogo kiojen aika raksatsüogo.

Venezuela yimtiba, Caracas nung osangbenertem den jembidang Archbishop Raúl Bior Castillo-i, "Arogo aika semdanga tensa asadangba sülen ni tang ang meyipa aru. Tenla ki 10 dak tali raksaogo," ta metetdaksü.

La Guaira nung Bishop Pablo Modesto González Pérez-i, "Onok electricity mali aser iba menoknok ajanga onok ajak kongshiogo. Seminary nunga jara aika chirepogo," ta metetdaksü.

Paissa, "Tenla ki aika raksaogo, ajisüaka putirtem shinga mesamaba atema pelar," ta ashi.

Iba menoknok lendong nung nisung 920 asüba jangjaogo aser nisung 4,000 dak tali yiruba den aika samaogo.



NSF aser AKM lenirtem Molungkimong yimtak Rev. Dr. Clark mezüing iba yimtaki tugudang jajaba lenmang nung agiba noksa ka angur. Parnok ya Molungyimsen nung sentong ka agir külen ano Molungkimong yimtak Rev. Dr. Clark aliba tesem aser pai inyakba mapatem repranga jajaba mapang agiba noksa ka lir. Iba kasa anogo nung Molungkimong nung Arogo aser yimten yimsüsürtem den külemi parnok sarasadem mapang tajung ka agia liasü. (June 26,2026).

ANO GO ABEN TSÜNGREM DEN

TEMESHIBA ASOSHI YAA TZÜRARTEM TEMOATSÜ
"Shiri temeshiba asoshi yaa tzürar parnok temoatsüba; kechiaser parnok tipatemtsü." (Mat. 5:6)

Alishi nung ayaba aser tzüraba ya meimchir taküm shiai meteter, aser aji mesüngzükdaktsüra nisungji timtemi air aser asür. Saka ayadang aser tzüradang chiyunga jematokra tip atemer. Tasüri dang iba aya tzüra ya memeteter. Aya tzüra aliba jagi nisung kaji ano taküm aliba sayur.Yamaji tanela nunga ayaba ka lir aser aji temeshiba asoshi ya-a tzüraba. Yisui itempurji temoatsüba ta ashir. Kechiaser temeshiba asoshi ya-a tzüra aliba ajanga tanela nung taküm aliba sayur.

Temeshiba asoshi ya-a tzüraba ya kechi dang ajar? Yimya sübaba agi amangba dang temeshiba asoshi yaa tzüraba tang majar. Kuli küptoka sentepi aoba dang tanela nung yaa tzüraba ta majar. Saka shir Tsüngrem bushinüba tanela keter tejangraba nung Pa bushir, item dangji chichiba tanela nung yaa tzürartem ta ajar. Dawid-i yamai ashi, "Mesüi ayongtzü rongjenba ama, kü nelai Tsüngrem, na asoshi rongjener." (T.Ken 42:1).

Kechiba benshir, atener, aser tenzüker saka tzüra matemer mesüra tip matemer? Kechiaser temeshiba asoshi yaa tzüraba mali. Iba tetsürabaji pastorbai, evangelistbai magütsütetsü, saka Tsüngrem temeshiba bushiba agi dang tzüra atemtsü.Temeshiba asoshi yaa tzüraba melira tebilemtsü tulu asünung, anogoshia Kibuba indang shisadanga alitsü merangdi.

SARASADEM:

Kibuba Yisu ne temeshiba asoshi yaa tzüra alitsü ni ne ajungba indang teti shisadanga lidi. Amen.

Rev Dr.Nüklu Longkumer taküm kaket saya



Dimapur, June 27(TYO): tenung " Khrista Tsungsu nung "Khrista Tsungsu nung kum 75" kum 75" tetezu kaket zulur ta ser Rev. Dr. Nuklu arishi kum 75 ajungba tenung Longkumeri pa takum otsu nung Tsungrem tenüng sanga zuluba kaket ka 26.6.2026 par kidang (Autobiography) Dr. Sosang Aoyimkum nung par chirnur Longkumeri lapokja saya aser aser semchirtem lia lapokogo. Rev. Temsu Aier Pastori tepela Iba kaket ya arogo shia nem aser tenungsang o jembir copy kaka agütsütsü Tsungrem nungi temoatsu merangtsü ta kaket züluri meshia sarasadem. Iba kaket metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yimyakoya

(n) nisung ka jaklaliru, libaliru yimya (behavior)

* Nisung ka shisatsü yimyakoya nung reprangteter.

Yimyanglur

(n) nübortem meima yimsü asür nem agütsüba naroka

(attributed name to good leader)

* Yimyanglur kibong nungi lenir tajung adoker.

OLONG PAITEP # 7548

1		2			3		4		5
				6		7			
8									
						9			
			10						
11									12
					13			14	
15									
16								17	

TIPIEN

1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashirtem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7547 TELANGZÜBA**TIPIEN :**

2. Aot, 4. Anempong, 5. Kok,
6. Arendak, 9. Züngtem,
10. Tendang, 11. Tzü,
12. Ayongzü, 13. Tsü.

LANGTSÜNGLEN :

1. Anük, 3. Tekujong, 6. Angentet,
7. Enzü, 8. Imsa, 10. Teyu.

NAI-A YA METETTER

Nüngtugu wrestler aser WWE ambassador John Cena-i pop culture nung naroküm tajung nguteta lir aser maneni pa Guinness World Records ICON ama züngsemogo.

Taküm September ita Guinness World Records 2027 adok nung John Cena ICON induction indang adentsü.

2002 aser 2025 tsüngda John Cena-i WWE Championship titles (male) teimtiba nguteta lir. April 20, 2025 nü Las Vegas, Nevada, USA nung John Cena-i WrestleMania 41 nung Cody Rhodes madak takok nguteta 17 buba title angu.

Dibrugarh Police-i Rs 1.4 crore alang narcotics raksaa endok**Dibrugarh, June 27, 2026**

(Agencies): International Day Against Drug Abuse and Illicit Trafficking nung Dibrugarh Police-i Rs 1.4 crore jungnua drugs raksaa endokogo.

Hokolbarnü raksaa endokba narcotics nung brown sugar 271 grams aser ganja 77 kg dena liasü.

"Tanü raksaa endokba

narcotics ya tesüba ita 9 tsüngda apuba lir. Iba mapang tsüngda Dibrugarh nung drug dak sendakba ken o 67 benok aser nisung 112 puogo" ta Inspector General of Police (Law and Order) Akhilesh Singh-i ashi.

Tanü narcotics raksaa

endokba ya ozüngi melaba ama inyaker aser police-i drug trafficking aser substance abuse anema mapa tuluba inyaksü ta paisa ashi.

Linük ajungalen International Day Against Drug Abuse and Illicit Trafficking amungdang Dibrugarh nung iba mapa inyakogo.

2025 nungi Assam nung taila doctor 62 puogo**Guwahati, June 27, 2026**

(Agencies): 2025 nungi tenzüker Assam nung taila doctor 62 puogo aser sorkari maneni shirangertem kümüzka ayutsü aser healthcare system akangshitsü asoshi inyaka arudar ta Chief Minister Himanta Biswa Sarma-i ashi.

"Sorkari iba mapa inyaka aruba nung ken o 59 benoka lir. Asen loktiliba nungi temenen

atsüteta endoktsü atema tenanzükba lir" ta pai ashi.

"Onoki drug syndicate aser tanur kibong akümba anema inyaka arur tang onoki quack doctors aputsü indang mission inyaker. Iba ya asen healthcare system merüktettsü aser shirangertem kümüzka ayutsü atema lir" ta CM Sarma-i ashi.

Assam sorkari 2025 nungi

fake medical practitioners anema inyaka arudang ken o 59 benokogo aser quack doctors 62 puogo ta paisa ashi.

Nisungtemi qualifications mesüra registration tejanga melii doctor mapa inyakertem aputsü bushir. Tesüba küm ka tsüngda district aika nung mita aodang taila doctor aika puogo aser parnok dak ozüngi melaba ama tapet mapa inyakogo.

Margherita nung hornbill ozü khasetba atema nisung 3 apu**Guwahati, June 27, 2026**

(Agencies): Tinsukia district kübok Digboi Forest Division nung hornbill shikariba atema nisung asem puogo.

Assam Forest Department-i Inthem area nung kanga bulua manguba aser ozüngi kümüzka ayuba hornbill ozü shikariba atema nisungtem apu.

Nisung kari social media nung hornbill tasü ka sayua video ka prokshiba nung ajemdaker nisungtem apu. Iba video anguba sülen conservationists aser

wildlife enthusiasts-i ola adoka liasü aser Forest Department-i bushisüngdang tenzü.

"Iba osang angashili department-i mapa tenzüker aser kechi koda asüyonga wildlife crimes odang meyuütsüla" ta Assam Environment and Forest Minister Jayanta Malla Baruah-i ashi.

Bushisüngdanga arudang kulitem anguba nung ajemdaker forest ketdangsürtemi iba tatalokba dak sendakba nung nisung asem apu. Wildlife (Protection) Act, 1972 kübok

parnok anema ken o benokogo.

"Ozüngi kümüzka ayuba ozü khasetba ya Assam nung natural heritage amakba inyakym ka lir. Ketdangpurtemi ibala mapa inyakertem maitü jangjatsüla aser tarutsü nung meinyaksüsa tapet temerenshi agütsüla" ta conservationist Devajit Moran-i ashi.

Great Hornbill aser Oriental Pied Hornbill densema Hornbill ozütem ya Digboi, Dehing-Patkai, Margherita aser Tinsukia district temeket nung angur.

Longding district nung NSCN-K (Ang Mai) züngsem ka apu**Dibrugarh, June 27, 2026**

(Agencies): Arunachal Pradesh kübok Longding district nung NSCN-K (Ang Mai) züngsem ka puogo.

Security forces aser Arunachal Pradesh police külem telok kati Pangsau area nung mita aodang telungpur ka apu. Iba nisung ya 2nd Lieutenant Wanglai Wangsa (Laipa Wangsa) ta jangjaogo.

Pa ket nungi semi-automatic pistol, magazine aser live 7.65 mm ammunition bena aliba puogo.

Wangsa-i 2012 nung NSCN (K-Angmai) nung aden ta osang angazüker. Pa ya Longding Police Station Case No. 43/2022 atema bushitepa aru ta police-i ashir.

Iba ken o ya Attar Sharma tepsetba atema lir aser IPC, Arms Act aser UAPA kübok benoka

liasü.

Assam Rifles aser Arunachal Pradesh Police ajanga Tirap district nung NSCN-K (Ang Mai) züngsem ka apuba sülen anogo ishika lir Wangsa puogo.

Tirap district nung apuba telungpurji Longsom Losu alias Gangsa (32) ta jangjaogo. Pa ket nungi 7.65 mm pistol, magazine, aser 7.65 mm ammunition bena aliba ngutetogo.

Iran-i US den sendaka aliba temsemtem amak

Dubai, Aami/June 27 (Agencies): US-i Iran south len tzüküm amakba atema telangzüba agüja parnokia Honibarnü US den sendaka aliba tesemtem makogo.

Linük ana tsüngda taoba hopta rara anendaktsütsü atema tenangzüktepba yangluba sülen manidakba atema kati ka dak tai tongloktsütepa arudar.

Iran indang foreign ministry-i, parnoki amakba tesemtem indang osang tejangja magütsü, saka ashiba agi, US-i linük south len tzüküm nung surveillance facility tem amakba atema parnoki telangzüba agütsüogo. Iba inyakyim ya U.N. Charter anema lir ta ministry-isa shisem.

Kasa mapang nung Bahrain kong U.S. Navy indang Fifth Fleet amendaka lir parnoki, Iran-i drone amshia par litsü makogo, koba par linük sovereignty anema aser iba ajanga security amokmerener ta ashiba den, tsükchir nungi linük kümzüka toktsütsü atema parnok temeden lir ta shisem.

US nunger amendaker aliba tesemtem amakba indang Washington-i tang tashi nung kecha telangzüba agüja mali.

U.S. military-i ashiba agi, Iran-i Strait of Hormuz nung khu abenba rong ka drone amshia amakba atema parnoki Hokolbarnü telangzüba agütsüogo. Strait of Hormuz ya energy supply atema tongtiband lenmang ka lir.

Tanga tatalokba ka nung Israel aser Lebanon na Iran-i teyari agütsüba Hezbollah telok aser Israel na rara tembangdaktsütsü atema tenangzüktepba ka yangluogo.

Telok anapronglai ashiba agi, iba tenangzüktepba yangluba ya mezüngbuba jenjang agiba dang lir. Tenangzüktepba kübok Hezbollah pur disarm asütsü aser Israel nunger sepaitem Lebanon nungi atsüngintsüba densema lir, saka iba ya koma

benoka inyaktsü aji mejangja. Hezbollah-i ashiba agi, parnoki teka amteper minyaktsü.

Iran state television-i sangdong ka ajanga ashiba agi, US nunger sepaitemi tzüküm nung aliba Sirik yimti nung communications tower ka amakba sülen linük Revolutionary Guards-i telangzüba tapet agütsüogo.

Kasa mapang nung Iran indang Mehr news agency-i ashiba agi, iba rongnendak taoba mapang ama dang inyaksangshidar aser iba facility mesüra hadirtem raksaba osang kecha mali.

Rara tembangdaktsütsü atema alima kintemi takok tashi merandangaka Iran-i tesem balala maneni makdar aser iba ajanga parnok meketa aliba tesem yimjung aser tamendakdak raksatsür, ta Bahrain-i ashi.

Parnokisa, U.N. Security Council Resolution 2817 aser June 17 nü Islamabad memorandum of understanding anema inyaksangshiba atema Iran aitsüogo.

Brehostibarnü Oman tzüküm nung khu abenba rong ka amakba ya Iran-i nangzüka mali. Iba melena parnoki Strait of Hormuz nung rongtem senzüsenpong azüoktsü atema parnok dak tashi aliba indang jembi aser ashiba agi, Tehran-i lapokja aliba lenmangtem nung dang rongtem senzütsüla. Parnokisa, Gulf state tem dang Washington pusema inyaksangshi masütsü amokmerenogo aser ashiba agi, Iran aser US na tenangzüktepba yangluba ajanga iba tzü lenmang nung rongtem azüoktsü atema parnok nem tashi agüja lir.

Iran indang parliament national security committee Ebrahim Azizi-i Honibarnü ashiba agi, Iran-i strait ajanga rong senzüsenpong atema

tetuyuba agütsüba sülen tashi anga manidakertem merenshitsü.

U.S. Central Command-i, Iran-i Brehostibarnü rong ka amakba ya commercial shipping anema jenjang agiba ka lir ta ashiba den, iba lenmang ajanga rongtem teküzmükba kübok sensenpongdaktsütsü asoshi maneni teyari agütsütsü ta shisem. US-Israel nati February 28 nü nungi Iran mamak tsüngda iba tzü lenmang ajanga alima totzü aser LNG supplies pongusü nung kabo shibelena liasü.

US tatong tir JD Vance-i ashiba agi, US-i ceasefire deal atema nangzüktepba sülen tashi anga anidakogo.

"Iran-i ceasefire atema tenangzüktepba ka nung sign süogo. Onoki iba tenangzüktepba sülen tashi anga anidakogo. MOU benoka inyaktsüba dak sendakba anung memulungba kar lira parnoki phone ajanga jembitettsü. Ajisüaka parnoki jenjang agiba yari telangzüba agütsütsü," ta Vance-i X ajanga ashi.

Iba lendong matalok tsüngda Hokolbarnü totzü jenjang shilem 3 agi tajemba aküm.

Saudi Aramco-i Gulf nung parnok indang Ras Tanura terminal nung totzü load asü tenzükogo. Iba ya alima nung totzü shibelentsü atema rongnendak tulutiba lir. Maneni fertilizer abenba rongtema strait ajanga senzüsenpong tenzükogo aser iba ajanga alima ajunga nung chiyongtsü jenjang timba küma oya aliba ajemshitsü asoshi teyari agütsüogo.

Iran foreign ministry-i ashiba agi, iba strait ya Iran aser Oman nati azüoktsüla. Ano Iran lenir indang adviser Ali Akbar Velayati-i, Gulf nung Washington den sendaka aliba linüktem dang parnok tia ya Tehran-i koba tashi azüzükteter iba dak keta lir, ta ashi. \

Ukraine-i Volgograd tesem nung defence plant ka amak

Kyiv, Aami/June 27 (Agencies): Ukraine nung yangluba Flamingo missile temi Russia kübok Volgograd tesem nung artillery systems aser missile launch system atema component tem yangluba plant ka makogo, ta tir Volodymyr Zelenskiy-i Honibarnü ashi.

Iba tesem amakba sülen Titan-Barrikady plant nung mi adoka liasü, ta pai Telegram ajanga metetdaktsü.

Ukraine indang SBU security service-ia, drone temi Russia kübok Vladimir tesem nung iba ita tang agi tanabenbuba "Vtorovo" oil pumping station makogo.

Iba station ya, Russia nung domestic consumer tem aser export atema petroleum product tem yokba tongtiband tesem ka lir, ta SBU-i Telegram ajanga metetdaktsü.

"Ukraine indang long-range sanctions maneni atsülanga odor," ta Zelenskiy-i ashi, koba arrtsü nungi pilar Russia kübok tesem balala amakba indang jembirba liasü.

"Anogoshia nongshiba ajanga tatem nung ajaki agizüktettsüsa yimjung

yanglutsü asoshi tamendakdak renema toktsür," ta paisa shisem.

Russia-i linük yimtiba Kyiv aser tanga yimtitem amakba atema telangzüba agüja Ukraine-i ita ishika tsüngda drone amshia Russia indang oil facility aser prangbong injang aser hadir balala yangluba tesemtem maka arudar.

Rara tenzüker küm pongububa ajungba mapang arrtsü nungi km 1,200 dak tema pilar raradar aser Russia-i aonungshia amai drone noklang aika yoka Ukraine nunger yimti aser infrastructure tem maka arudar.

Ukraine indang energy company, Naftogaz-i ashiba agi, Poltava aser Kharkiv nung parnok indang production facility tem taoba anogo ana Russia-i drone aser missile amshia amakba sülen raksaago.

Zelenskiy-i ashiba agi, Russia-i, taoba hopta drone 14,000 aser missile 19 yoka Ukraine kübok tesem 15 amak. Paisa, air defence supply aser allies tem den drone cooperation ya Kyiv asoshi ajak dang tongtibandtiba lir, ta ashi.

Venezuela menoknok lendong nung asür 900 dak tema jungogo

Caracas, Aami/June 27 (Agencies): Venezuela nung menoknok tesashi anokba sülen anogo asembuba nung asür 920 jungogo aser nisung 51,000 dak tema samar bushidar.

Bodhbarnü La Guaira temeket nung tzüküm nung aliba tesemtem 7.2 aser 7.5 magnitude menoknok ana agi anokshitsüba sülen ketdangsürtemi Hokolbar aonung nungi gari senzüsenpongtsü atema tenokdangba kar agütsüogo, kechiyong iba ajanga teküzmükba maparen balala benoka inyakba nung tetsükdaktsü adoker.

Sorkar rescue team tem agi anüngba mapang menoknok agi kanga mejungi kongshir aliba tesemtem nung Venezuela nungertemi pei teka amshia tesem balala merekteta nisungtem kümzüksü merangdar.

Nüburtemi, menoknok agi kongshir aliba tesemtem nung sorkari ashiba dang nungi state rescue team tem ishiba inyaksangshiba anguba lemsatepogo.

Sorkar ketdangsürtemi La Guaira nung lendong nungi jenbor alirtem nem chiyongtsü aser tzü lemtsüdar, aser acting tir Delcy Rodriguez-i ashiba agi, lar sorkari nüburtem kümzüksü atema takokba tashi inyakdar.

Laisa, linük balala nungi

teküzmükertem aser humanitarian teyari balala pelashishia agizükogo.

Rodriguez-i ashiba agi, La Guaira "militarised" süogo aser teyari talila arudar, ajisiüaka iba tesem nung alirtemi ashiba agi, teyari agütsüba ya parnok nüngdakba shilem tilaka dang lir.

Caracas nung teküzmükertem mapang arishia ki chirteper aliba nung sabanga alirtem kümzüksü asoshi inyaktepdar.

Lendong nung asür timba akümtsü imlar, kechiyong nisung meyrejang aika samar bushitepdar.

Hokolbarnü tashi nung yirur alir 3,300 dak tema junger liasü aser ketdangsürtemi ashiba agi, parnoki nisung 243 kümzükogo.

International Organization for Migration-i ashiba agi, iba lendong ajanga nisung million 6.76 dak kongshitsü, kong Caracas kija nung million ana lir.


International Red Cross regional director for the Americas, Loyce Pace-i ashiba agi, nüburtem pir kidangi aitsü tsübuteper.

Venezuela nunger ketdangsürtemi ashiba agi, Mexico, US, El Salvador, Switzerland, Colombia aser tanga linük nungi volunteer 861 linük tonga aruogo aser ano tangalen nungi aika arudar.



Human rights organization; Baloch Yakjehti Committee (BYC)-i sangdong ka ajanga parnok lenir Mahrang Baloch Nobel Peace Prize atema tanabenbuba nominate asüba metetdaktsüogo. Frontier Corps ketdangsür ka tepsetba atema Pakistani Anti-Terrorism Court-i Mahrang Baloch densema activist pezü taküm tepeyong tepuokdak ayutsü atema obendang agütsüba anogo ishka lir iba osang ya sangdongogo.

FIFA WC: France, Cape Verde, Egypt, Spain knockout round tongogo



(Abelen) Ousmane Dembele-i tasenbuba goal idaktsüba noksa nung angur. (Teyong) Iran nunger asayar Shoja Khalilzadeh-i Egypt den asayba mapang tanabuba goal idaktsü saka magi. (Achiji) Spain nunger asayar Pedri aser Uruguay nunger asayar Valverde na ball raktepba noksa nung angur

Aami/June 27, 2026 (Agencies): Honibarnü Boston Stadium nung Norway goal 4-1 agi akokba sülen France pur iGroup I nung asaya asemprongla koka temaba jenjang nung tembangogo.

Mezüngbuba round tatembangbuba asaya nung Ousmane Dembele-i hat-trick ka idakja par team nem teyari tulu agütsü.

Asaya tenzüker minute 7buba nung dang Dembele-i mezüngbuba goal idaktsü aser mapang tatsüka dang lir tanabuba goal idakja liasü.

Goal ana achiba sülen Norway atema Aasgaard-ia goal ka idaktsü, saka parnoki iba dak alanga goal ka danga midaktsütet,

Iba sülen maneni Dembele-i goal tasembuba idaktsü aser Desire Doue-i goal 4buba idakja parnoki asaya akok.

Kasa mapang nung World Cup nung taküm mezüngbuba asayaba team Cape Verde pur group stage nung asaya asemprongla draw asüba sülen parnok knockout round-i iogo. Tasembuba asaya nung parnok Saudi Arabia den draw asü aser Uruguay-i Spain makokba sülen parnok taruba round tongtetogo.

Asaya asem draw asüba sülen parnoki point asem nguteta parnok Spain sülen tanabuba jenjang nung tembang.

Saudi Arabia den asaya goal kaka danga magütsüteti tembangba sülen Cape Verde pur asayar aser parnok

pusemertem ajak kanga pelatepa liasü.

Cape Verde ya FIFA World Cup puti otsü nung iba asayamung nung asayaba linük (nütsünyongsük apitep nung) tilatiba rongnung tasembuba lir

Tanga asaya ka nung Egypt aser Iran na goal 1-1 agütsür asaya tembangba sülen Egypt tang mezüngbuba knockout stage atema qualify sütetogo.

Asaya nung minute 93buba nung Iran team-i goal ka idaktsü, saka VAR asadanga sülen goal idaktsüba asayar ya offside asüba nguteta liasü.

Iba sülen minute asem dang lir parnoki ano crossbar nung ball ka metsüokja automatic qualification atema maongka magiteti liasü.

Iba asaya draw asüba den Belgium-i takok anguba sülen Iran team tasembuba jenjang nung lir aser round of 32-i aitsü atema tanga asaya result dak keta lir.

Iran team ya tasembuba jenjang nung aliba team tajungtiba rongnung trokbuba nung lir, aser tasembuba jenjang nung tembangba team ti dang knockout stage-i aitsü.

Group G asaya tanga ka nung Belgium-i goal 5-1 agi New Zealand koka round of 32 tongtetogo.

Goal difference nung Egypt jakdang temaba jenjang nung tembangtsü atema goal aika agi asaya akoktsü nüngdaka asayaba mapang Belgium atema Leandro Trossard-i

goal ana idaktsü aser Kevin De Bruyne, Romelu Lukaku aser Alexis Saelemaekers nungeri goal kaka idakja liasü.

Maneni Group H nung Hokolbarnü Spain goal 1-0 agi makokba sülen Uruguay team iba asayamung nungi tsükogo.

Par telok nungi Spain temaba jenjang nung tembang aser Uruguay-i point ana dang nguteta parnok knockout round-i aitsü atema timla mali.

Uruguay ya world rankings nung jenjang 16buba nung lir aser parnok ya par telok nung Spain sülen team tajungtiba liasü, saka parnoki imlaba ama masayatet.

Asaya nung goal ka ya Alex Baena-i idakja liasü.

Badminton Asia Junior C'ships: India team quarters-i iogo

Aami/June 27, 2026 (Agencies): Badminton Asia Junior Mixed Team Championships nung India team-i kanga junga asaya arudar aser Honibarnü Group C nung parnoki Kazakhstan 2-0 (55-31, 55-21) agi koka quarterfinals-i iogo.

Chinese Taipei den group-stage nung tatembangbuba asayaba sülen pool toppe shiba asütsü aji jangjatsü. Iba asaya nung India team-i tarep asaya tendanga asaydaktsüdang saka parnoki maneni asaya amokbanger asaya liasü.

Tetsür tarep asaya nung Durga Esha Kandrapu aser Keerthy Manchala nati 11-5 agi

Alissa Kuleshova aser Diana Namenova na koka asaya kanga junga tenzütsü.

Iba sülen tarep temeyoktep asayar Puneeth Suresh aser Deepti Raj Aditi na Mustafa Malikzhan aser Kuleshova na den asaya. Iba asaya ya kanga meranga asayarang India nunger tarep yagi 11-10 agi koka liasü. Asaya ana akokba sülen point 22-15 aküm.

Iba sülen tanungba asayatem India team-i amokbanger asaya aser mezüngbuba relay ayong ayonga akok aser tanabuba relay-a parnoki kanga junga asayateta liasü. India nunger asayartemi kija asaya ka nung

danga point trok dak tali magütsü asaya aser iba ajanga team ana tsünga tebendang janga janga sayua liasü.

Iba asayamung nung India team Group C nung Chinese Taipei, Kazakhstan aser Philippines den ata lir.

Badminton Asia Junior Mixed Team Championships nung mezüngbuba asaya nung Philippines 2-0 (110-59) agi koka tenzütsüba sülen taoba mapang bronze medal ngur aliba team ya Chinese Taipei den asayatsü asoshi rangloker lir. Linük ana asaya shibai kokdir parnok Group C nung temaba jenjangi tua knockout round-i aitsü.

US Open: Devika Sihag semifinal-i iogo

Aami/June 27, 2026 (Agencies): Azerbaijan International champion Devika Sihag, shiba tang asaya aliba US Open nung sixth seeded asayar lir, lai Hokolbarnü third seed asayar Riko Gunji koka semifinals-i iogo. Arishi küm 21 tain asayar yagi iba asaya ya tenüng asangtsü langa asayatetogo.

Thailand tsür Tonrung Saeheng kanga meranga asayar akokba sülen la iba asayai ai, aser Gunji den asaya ya Devika-i akoktsü kangabo timla maliasü.

Japan tsürla shiba taküm küm tetenzüklen Swiss Open nung quarterfinal tonga asayaago, lai asaya tatem tashi Devika nongshia asaya saka India tsürla yagi iba asaya 22-20, 21-19 agi koka semifinals tongtetogo.

Devika semifinal nung second seed, Danish shuttler Line Christophersen den asayatsü. Tena tsünga tang mezüngbuba asayatsü lir.

Christophersen-i quarterfinal nung kanga toktepa asayar India tsür Tanvi Sharma 21-16, 11-21, 21-11 agi koka liasü.

Kasa mapang nung Rakshita Santhosh Ramraj-a Canada tsür Rachel Chan-i 21-15, 16-21, 12-21 agi tsükdaktsüogo.

Kasa asayamung tebur kija asaya nung Rounak Chouhan-i

Israel nunger asayar Misha Zilberman 23-21, 21-11 agi kokogo aser pa taruba asaya eighth-seed Su Li Yang den asayatsü. Chouhan-i taoba asaya nung top seed Chou Tien Chen koka liasü.

Rounak-i pa dang nungi tajangshiba timba bener aliba asayar Chou Tien-chen ya tetenzük nungi nongshia asaya liasü. Mezüngbuba game nung Chou ya 17-15 agi tejakdang liasü, saka Rounak-i point trok atonga nguteta mezüngbuba game akok.

Tanabuba asaya ya Chou Tien-chen-i mapang talangba ka amokbanger asaya aser decider asayatsü akok ta bilema liasü, kechiyong Chou 17-11 agi tejakdang liasü. Ajisüaka Rounak-i maneni point trok atonga ngua tena point kasasa aküm aser asaya meyipdakja liasü.

Iba sülen asayar ana ya kanga toktepa asaya aser Chouhan-i game point pezü kümzütsüba sülen pa indang tanabuba match point nung asaya koka liasü.

Tebur kija asaya nunga Kidambi Srikanth-ia 21-9, 12-21, 21-8 agi Liao Jhuo-Fu koka semifinal tongtetogo. Pa semifinal nung fourth seed Yudai Okimoto den asayatsü.

CDFA-i 2buba District Football League ayonger

Dimapur, Aami/June 27 (TYO): Chumoukedima District Football Association (CDFA)-i ayongzüka 2buba District Football League 2026 den repsema Late Rokonicha Champions trophy asayatsü.

Iba asayamung ya "One Chumoukedima" omen nung ajemdaker July 25 nungi August 15 tashi Chumoukedima Football stadium nung asayatsü.

Honibarnü osangbenertem den sensaksemba mapang association-i, local football club tem nem structure platform ka aser sempet aketba lanur asayartem nem parnok sempet sayatsü atema maongka agütsütsü aser iba den sportsmanship, telungjem aser district nung tetoktepba jenjang ajungkettsü atema parnok

bendanga agütsür lir ta ashi.

Iba asayamung nung Chumoukedima District Football Association kübok züngoksema aliba team aser asayartem dang asayatsü melatsü. Mezüngbuba asayamung nung shilem agir aliba club tem nem tama maongka agütsütsü. Asayamung nung guest asayartem asayatsü memelatsü aser Under -20 asayar anana asayatsü asoshi maongka agütsütsü.

Asayamung nung team ti league basis nung asayatsü aser temaba jenjang nung tembangba team pezü Champion Cup atema tokteptsü.

League Champion akoker nem senpet sen 70,000 den takok marok aser kuli kak

asir Runner Up sen senpet sen 40,000 den takok marok aser kuli kak agütsütsü.

Maneni Champions Cup akoker nem senpet sen 70,000 den takok marok aser kuli kak agütsütsü. Asayamung nung asayatsü atema züngoksemtsü asoshi tatembangbuba anogoji July 18 asütsü. Asayamung atema cdfaestd2022@gmail.com ajanga züngoksemtettsü.

Champion trophy ya asür Rononicha'er kibongi sponsore asütsü. Parnoki taruba asayamung asem atema senpet agütsütsü.

BILEMDANGANG

"Kibubaji ngutettsüsa alidang bushiang."